

Segun Minister Otmar Oduber

Gobierno ta cumpliendo ‘al pie de la letra’ cu contract cu EcoGas

ORANJESTAD – Minister Otmar Oduber a laga sa cu gobierno ta cumpliendo ‘al pie de la letra’ cu e contract cu a wordo firma cu e compania EcoGas. E declaracion aki ta bin net awor cu documentonan manera e convenio entre Serlimar y EcoGas; y tambe e calculacion haci riba e tipping fee pa un compania di accounting, a cuminsa sali publicamente den prensa relaciona cu e impasse entre gobierno y EcoGas.

E mandatario ta haya cu na momento cu un di e partinan involvi den e contract ta sinti cu no a cumpli cu e contract, libremente bo por bay Corte. Den e caso specifico aki, e ta haya cu si gobierno no a cumpli cu e contract, EcoGas por a bay Corte pa busca nan derecho den Corte. Pero den e caso aki e no a scucha e compania a bay Corte pa algo cu gobierno no a cumpli cune.

E ta haya cu apesar cu gobierno si ta cumpliendo cabalmente cu e contract, lamentablemente e compania

EcoGas, no a cumpli cu loke tabata parti di e contract. E mandatario a bin cu potretnan pa ilustra cu cantidad di desperdicio cu supuestamente mester wordo hiba na Parkietenbos, caminda e compania mester a paga tipping fee, y nan no ta haciendo esaki. Mas bien nan a crea un dump patras di e mesun compania cu e mandatario no ta kere cu ta corecto cu esaki ta tumando luga.

“Ami si por mostra riba echonan cu nan no ta cumpliendo cune den contract,” el mandatario a declara na prensa dialuna ultimo. Mientras cu gobierno y den e caso aki Serlimar na su turno si ta cumpliendo debidamente cu loke nan a cumbini cu EcoGas den e convenio aki.

Igualmente encunto e destaho publico cu a wordo amplia te dia 31 di juli awor pa e compania interesa den e proyecto di insinerado grandi, e mandatario a reitera cu gobierno no lo tin cu hinca un florin tampoco den dje.

El a aclaria cu te awe nan no a haya niun oferta cu ta bisa

gobierno cuanto e tipping mester ta. Tampoco no ta asina cu gobierno a haya oferta di companianan interesa den e proyecto di insinerado cu ta bisa kico e prijs mester ta pa bende coriente na WEB of kico ta e prijs of tipping cu mester paga pa sushi.

E ta kere cu rond di e caso aki tin hopi desinformacion caminda ta wordo mescla e

contribucion cu mester bin na Serlimar y tur loke ta tumando luga riba maneho di desperdicio di sushi. Te hasta a wordo papia di 300 miyon dollar pa bin cu e proyecto di insinerado, mientras cu te ainda gobierno no a haya niun oferta aden na Aruba.

Minister Oduber a indica cu esaki ta un proceso transparente caminda un comision

-cu el a cualifica como un ekipo serio- integra pa profesionalnan di gobierno y di afo, sindicato, sector comercial ta forma parti di dje. Tambe PAHO y conseheronan internacional, kendenan a bisa cu esaki ta e caminda cu pais Aruba mester bay, segun e Minister encarga cu Infraestructura, Desaroyo Teritorial y Medio Ambiente.

